

Seese-Seese

CP

Tono

5

Deftere

1

AULAY



République du Sénégal



Ministère de l'Education nationale

Vente interdite



Pulaar

Seese-seese

Tolno 5 Deftere 1

Édition 2018
Réimpression 2020



Avis de droit d'auteur : ©2016-2021 projet Sénégal Lecture Pour Tous pour l'Agence des États-Unis pour le développement international (USAID), contrat USAID n° AID-OAA-I-14-00055/AID-685-TO-16-00003, géré par Chemonics International. Tous droits réservés. Cette aide provient du peuple américain et est financée conjointement par l'USAID et le gouvernement du Sénégal.

Ce travail est disponible sous la licence Creative Commons Attribution 4.0 IGO licence (CC BY 4.0 IGO) <http://creativecommons.org/licenses/by/4.0/igo>. Sous cette licence, il est accordé le droit de copier, de distribuer, de diffuser et d'adapter ce travail y compris à des fins commerciales selon les conditions énoncées de la licence CC BY.

Loowdi deftere ndee

Poolen jontinooje	4
Yerel ko paawaado	24
Danngal booyn gal.....	44
Wuro Falto e Wuro Safro	64
Ngoone ko ɳaasaado.....	84

Poolen jontinooje



Aminata nani lelii nder suudu, e dow leeso,
omo siñña, omo suddii mbajju.

So a yi'ii mo, omo harlitoo tan, ina wa'i no
mo reedu mum muusata.

Gite dee ede naatti, banndu nduu ina wuli.
Ullungel ina e sara makko, ina taasoo e
makko, kono o yi'aani ngel.


Foondu wuugeeru arii haa rippii e dow
junngo makko nano ngoo, kono o tinaani.

Neene Kummba naatii e suudu hee, o tawi
omo tampi.

Noon tan, on wi'i mo : « Aminata am, aan
kam ko ngondu-daa ? »

O wi'i dñum : « Miin dee, ko banndu am tan
wuli, hoore am kadi ina muusa. »

Tan neene Kummba fawi junngo mum
e tiinde Aminata, o wi'i : « Hee ! hee !
Jonnde alaa, binngel am gootel ngel Alla
okki mi ngel, leloroo nii !
Mi wi'ataa so baaba maa woniino doo,
ko jooni njahdaten galle-doktoor. »



Nde ɓe njottii tan, ko doon o jaggaa to
safrirde too, o ñibanaa butel sowetaas.
Doktoor oo noddi neeniraawo oo, o wi'i
dum ko paawngal libi suka oo.

O wi'i dum, mate o huutortaako sanke
cuuwaado.

Neene Kummba turi tan, dey yi, ellee ko
faayre jaggi dum.

Doktoor oo wi'i mo : « Debbajo, gooto e
men kala ina foti jogaade sanke cuuwaado.
Ko kañum dadndata en e paawle ndunngu.

En potaani fadde haa paawe-den
nde puddo-den ummaade.
Eden poti wadtude hakkille, gila law,
e ñabbuyon hono paawle kon.
Fadde haa ñawa nde fuddoo arde,
dum addata tan ko jobgol keewngol.
Cukalel ngel tampii no feewi, nafii nde
njaaw-daa addude ngel gaay.
So booytiino seeda e juude maa tan,
ina waawnoo jibinande ma musiiba. »



Maa mi tottu ma sankeeji didi, so a arii e hootde.

A liirat di noon, hakke balde didi, e nder galle hee, haa balngol ngol iwa.

Yo a huutoro di, jamma kala ; dum jaraani mobtude.

Yeew cukalel maa ngel, ada ngel diilana sanke oo e nder suudu maggel.

Jamma fof, ngaraa yeewaa mbele ngel ittaani sanke oo.


Noon tan, doktoor oo woodi ko winndi
e kayit, totti mo.

O wi'i mo farmasii enani e damal hee,
yah soodoy ledde dee jooni.

Yo Aminata y'ettu de, alaa ko fadata heen.

O wi'i mo, yaawno ngaraa, mido fad ma
doo e biro am hee.

Sukaabe wonbe doo bee fof, ko paawle
libi dumen.



Goram, jooni Ullungel yeewaama no feewi
e galle hee.

Ngel alaa mo ngel fijdi, ebe borda,
ina njaha ina ngarta.

Wuuge kadi nani to dow tan, hay gooto
badotaako saka mema dum.

Foondu nduu anndaa do sehil mum oo
nawaaa.

So ndu waawiino, ndu rewa e makko,
be njahda.

Ullungel wi'i Foondu, yo ße ndaddu feere,
ße yeeewoya Aminata, sehil maßbe oo.


Ay, so en mbiyi neene Kummba yo o naw
en, o jabataa, duum laabaani.

Kanko, o yidaa yo en yeeew hay nokku,
walla yo en njah hay nokku.

En nganndaa do Aminata woni,
en nganndaa samorii walla samoraani.

Foondu wi'i mo : « Maa mi sukku e neene
Kummba so omo yalta.

Maa mi anndu e hol lopitaal sehil men Aminata
oo antiraa. »



Ko noon Foondu wadi haa laabaa lopitaal
mo sehil mabbe woni oo.

O yahi, o haalani Ullungel to nokku oo
woni.

Ullungel weltanii mo no feewi, woni tan
e yiilde laaci do woni doo.

So Ullungel yahii haa ina likkoo Foondu
tan, ndu diwa, ndu rippoyoo do godđum.
Ullungel wi'i đum : « Woto dog am,
mi wadataa ma hay huunde. »

Ñalaande wootere rewi heen, kulle didi
dee njahi lopitaal, be yeeewoyi dafaado
mumen oo.

Be ngari, be cuudii caggal damal ngal haa
neene Kummba yalti, be puddii naatde.

Nde Aminata haaytii be tan, o ummii,
o joodii, yeeso ngoo fooyni.

Doon tan, o yetti Ullungel, o woni e raayde
ngel, omo buuc oo ngel.

Foondu woni e diwdiwtude tan, do woni
kala ndu rippoo doon.



Booytaani tan, bē mbaynitii Aminata,
bē mbiyi ebe ni koota.
Kooten hankadi, sabu so neene Kummba
hattiima en, hakkille mum deeyataa.
Galle e galle fof maa o dabbit en doon.
Ndeen o nokkanat en kacitaari, o resana en
bottaari e hiraande.
Foondi wi'i : « Neene Kummba, ndaw
koddiido moyyo ! »
Ullungel wi'i : « Biddo oo buri mo
moyyude boom, suudu mum mbaalat-mi.

Minen, min pin tan, min tawi Aminata e
galle hee. »

Omo yeewtida e neene makko, ellee alaa
ko hebi mo.

Neene Kummba ina wi'a mo: « Doktoor
totti en sankeeji didi.


Mi liirdii di no o wiiri nii.

Doo e balde didi tan balngol ngol yaha. »



Neene Kummba wi'i mo : « Maa mi diilane
heen gooto e nder suudu maa.
Woto ittu mo noon do o woni doo.
Sanke oo waawi bowdi no ndiyam waawri
jayngol nii.
Bonngu badotaako do dum woni, abada !
So bonngu yi'ii dum tan, y'ettat kaake
mum, wi'a mes ! »

Aminata naattii e suudu mum, o tawi endu
feewnaa haa yoodi, haa ndu laabi.
O yuurnii les leeso ngoo, omo dabbita
sehilaabe makko bee, o yi'aani hay ndiga.
O joodtii e leeso ngoo, haa seeda tan
o nani neew, neew, neew.
O yeycii ñaamo makko, o yeycii nano,
omo laara, o nantaani hay ndiga.
O udditi falanteere ndee, boowal ngal ina
wi'i selew, alaa ko dilli.
O wi'i mate ko o jogordo najde, hol to
Ullungel e Foondu ?



Doo do yaltata suudu makko tan, woodi ko
ferii koyde makko.

O yahi haa o debi yande, o nantii e balal
hee, o wi'i : « Haa ! »

Woodi ko ñohani mo, wi'i mo : « Ko
ullundu, endu caggal maa. »

Doon tan, o yiiltii, o jaggi ullundu,
o wi'i dum : « Ngol kam a boccittaako. »
Ullungel wi'i mo : « Mido felliti ko Foondu
feññini mi. »

Ullungel e Foondu puđđiima habde
e ńowđi dii.


Foondu ina wifira bibje mum, kala do
bonngu ummorii.

Ndu naatii e cuudi hee, ndu yawti e
mbarwardi ndii, ndu yottii haa to
kaatane too.

Ndu rewi e lobbuli hee fof, ndu riiwi kala
do bonngu woni.

Kala do ndiyam tuđnoo, ndu noddi
Ullungel, ńe pitti doon haa laabi cer.

Ullungel fottitini mbuuwri ndii fof nder
nokkuyel tokosel, nawi, rufoyi jinnde.



Aminata wi'i : « Hee, on mbetti kam dee ! »

Poolel wi'i : « Mi yidaa yiide hankadi bonngu
ina dardarta doo henna, e galle hee.

So wonii bonngu yeeyata ko sobde, haa ina
yana e sehil am oo, ko miin ngu tawata doo ! »
Ullungel ne wi'i : « Doo, ngu wontaa
weldeede doo.

So o reenaaki, mi wada mo cakkudi,
mi liyora mo maaro am. »

Ko tuggi koo hannde, Aminata e sehilaabe
mum pellitii renndude, be kaboo jontinooje.
Doktoor anndinii be ko addata düm,
e no raabtirta fof.

Ko kuutoragol sanke cuuwaado woni
njogitaari moyyiri ngam foolde paawle
ndunngu.

Heblaade gila law, duum buri hodde
e safraade ñande kala, ada waasa jawdi maa.
Woto en ñallin, woto en mballin, yetten
peeje men e kala sahaa, ngam foolde
bowdi.



Kala do wadi tudannde ndiyam, yo en ubbu
dum, walla korsen ndiyam d'am.
So ndunngu wadii, yo en ngittu kala ko
waawi tuđnude ndiyam.
Yo en labbin, gila e dow cuudi,
haa e mbarwardeeje galle dee fof.
Woto en ngaccu hay nokku gooto do
bonngu waawi jibinde, ina adda ñabbuuji.
So fof'en njaggii heen, maa bowdi ngeggu,
di luba en doo haa cay.

Paawle ndunngu, maanaa jontinooje, ko duum
musiiba mawdo wonande leydi.

Ko wadi dum bonde fof noon, ko dum accaani
suka, accaani mawdo, accaani debo-reedu.

Bonngu anndaa mo faalaaka dum, anndaa
nii tikkando dum.


Bonngu anndi ko waddeede pedeeli e gite,
habtaade dum haa luba en doo waddii en.

So en kuutoriima sanke cuuwaado,
no haanirta nii, maa en pool bowdi.

NAAMNE DEE :

1. Hol ñawu hebi Aminata ?
2. Hol no sehilaabe Aminata bee
mbadi haa be yeeewoyi dum lopitaal ?
3. Ko wadi haa Poolel salii yo
Ullungel likko dum ?
4. Ko woni mijo maa e no Neene
Kummba daroranii nii Aminata, nde
o faawaa ndee ?

Yerel ko paawaado




Yerel, binngel Cewngu, walla Tuy-oolal,
joodii haa booyi tan woni e dojjude dojjo
muusngo.

Dum haawi neene makko, wi'i mo :

« Yerel am, ko ngondu-daa ? A faawa ? »
Yerel wi'i mo : « Neene, miin dee mi dojjat
tan, tee mi anndaa ko dum woni. »


Neene Cewngu halji no feewi, wi'i biyum :
« Janngo maa mi nawe lopitaal.
Maa doktoor oo safre haa cellaa. »

Yerel boornii comci kadooji jaangol,
sabu omo sikki ko buubol ngol dojjinta mo.
O yettii mbajju, o suddii, kono dñum
dartinaani dojjugol ngol.
Ko noon o suddorii jamma oo fof.
Nde gite laabi, neene makko wulnani mo
siwoo ndiyam njondam, nawi taarorde,
o lootii.
Kono dñum hadaani Yerel jaangeede,
ina siñña.



Yerel wadi sarbet, foppi banndu mum
haa sojji.
Omo boornii simis cakkirdo e silip.
O fawi heen simis gooto e tuuba makko,
o juuli, o boornii pade makko.
Neene Cewngu ina woni e feewnude
kacitaari.
O wadi kosam conndi e kaas, o wadi heen
kafe, suukara e ndiyam nguldam.
O totti Yerel kaas oo, e mburu e boor.

Yerel hacitiima haa haari.
Kanko e neene makko, ɓe njaltii e mbedda
hee.
Kamen dido fof, eɓe ni padi oto.
‘Be njowi taksi junngo, mo darii e sara
mabbe.
Neene mum Yerel haaldi noon e joom taksi
oo, ɓe nanondiri, ɓe njoli caggal oto.
Fowru, sofeer taksi oo, yaɓbiti fereñ, diirni
oto, ɓe njahi.



Be njahi haa woni dumunna, oto oo ari,
darii e damal lopitaal hee.

Neene Cewngu yobi Fowru sofeer, oon rutti
mo cewdi makko.

Be njahdi, kamen dido, be naati.

Neene oo tottiri teemedde nayi mbuudu.

Joom biro oo totti mo tikket, joopanii
mo, wi'i mo : « Yawtu yeeso maa, paataa
bannge nano, ko doon biro doktoor
Njawdi woni. »

Yerel e neene mum ndeggondiri, bë ngari,
bë tawi ñawbe heewbe ina padi.


Neene oo e cukalel mum ngel, kebi ban
gooto, bë njoodii, bë padi.

Nde bë njontaa naatde, doktoor Njawdi
uditani bë damal, bë naati.

O wi'i neene oo : « Joodo padaa, maa mi
toppito mo. »

Doktoor Njawdi yetti estetoskop, sukki e
noppi, o fawi lehel ngel e bernde Yerel.

Doktoor Njawdi wi'i mo : « Foof doole ! »



Yerel dōjji doole, doktoor oo hedii no
bernde ndee fidtirta.

Doktoor oo boyyi yi' al junngo ngal,
naamnii mo no foti balde o dōjji ?

Nde o gasni, o noddi neene Yerel, o wi'i
dum : « Cukalel ngel, engel wondi e ñabbu.
Ñawu nguu noon hoolnaaki. Maa yeeewe
no moyyi.

Maa mi wadan mo rajo, kadi min yeewa
tuute mum dee. »

Neene Ceewngu faayii, o anndaano ñawu
Yerel nguu ko nii wa'i muusde.

Dojjo bonngo ngoo, ko dum ñawu
kulbiniingu, tee ngu weebaani safrude.

Doktoor Njawdi wi'i : « Mi yeeewii Yerel,
mi tawii omo sedoo tan. »

Neene Cewngu jaggi Yerel e junngo,
be pa'i rajo.

Nde be njottii ndee, be mbi'aa yo be ngartu
janngo, be ngaddora kaalis.



Be ngummii doon, be pa'i to tuute dee
yeeewetee too.

Yerel wadanaa rakkor cewdo e nder goddol
mum haa o debi looyaaade.

Maa doktoreebe bee yew e tuute makko
dee ko addi ñawu nguu.

Be poodi tuute makko, be mbadi de e potyel.

Yerel e yummum kooti, kono maa be
ngartan janngo resiltaaji makko.


Janngo mum, neene Cewngu reggini Yerel,
addori njobndi yeewendu tuute dee.

Nde ɓe ngasni doon, ɓe mbadoyi rajo,
neene oo yobi.

Eɓe njoodii, kambe dido e baŋ, eɓe padi,
haa ɓe nani : « Yerel Cewngu, ar gaay. »
Yerel ummii, nootoyii Njamala.

Omo boornii wutte daneejo.

Nde o naati ndee do rajo doo, o boorti
comci makko dow dii fof.




Saal rajo oo noon ina heewi masinjaaaji.
Doktoor Njamala wi'i Yerel yo o daro,
o hikka bernde makko e masinj hee.
Dum wadi ndiiruyel, masinj oo portali
bernde Yerel.
Doktoor oo wi'i mo yo boorno comci makko
haa gasna, haalana mo.
O wi'i mo kadi : « Ngartaa baawo-janngo,
mi tottit maa rajo oo, kibbito-don to
doktoor Njawdi.

Yerel ina jogii mboros ñawu nguu e
bañndu mum.

Ñawu nguu woni ko e jofe hee, ko duum
rajo oo holliri.

Tuute dee ina mbadî bikkon rafi doyru,
ko ñawu ndaaboowu.

Maa mi hokku mo lekki, kono o joñete
bannge hade makko raabde heddiibe bee.
So o raabii be, ñawu nguu saroto e wuro
ngoo fof. »



Yerel fotaani renndeede kaas walla bool
ñaaamde, walla leeso doo e balde sappo
e joyi.

Neene Cewngu aanii, o anndaano ñawu
nguu ina wondi e bonannde fotnde nii !
Wi'aa yo Yerel seernde to mbalndi,
jargol e ñaaamde fof.

Kala ko o ñaaamrata, maa dum lawyiree
wordesawel e ndiyam mbawñudam.


Ko ndiyam nguldam ðam warata bikkon
ñabbu kon.

Suudu makko ina foti labbineede, kenorde
dee ngudditee mbele naange naata,
wara mborosaaji dii.

Doktoor Njawdi winndani Yerel podde
de o foti yettude.

Maa be ndewindo Yerel laabi laabi, haa
wona hitaande, ebe yeewtoo banndu mum.
Maa be ndew e mum haa be ngitta bikkon
ñabbu kon fof.

Jooni, Yerel safriima haa nattii dojjude,
ledde o tottaa dee ina cafra mo.



Abuu Cewngu, mawniiko, nawata mo
lopitaal, so Neene Cewngu ronkii yahde.
Ayse Cewngu yahii farmasii beydoyde
ledde safara dee.

Yerel ina ñaama e bool mum, kañum tan.
Omo yeewaa seeda, kono omo anndi dñum
booyataa, ko maa o muña.
So o sellii, maa o wadtu renndude e yimbe
lahal.

Baaba Cewngu ummiima Bame, ari
laaroyde Yerel.

O wađanii biyum Yerel suudu hesuru.

Yerel nattii janngoyde lekkol, ko o joñaaado,
sabu hulde woto o raabde wodbe.

Yerel ina yeewaa, o alaa hay mo o rewtedii
janje makko ndee.

So o udditi kayee makko oo, o janngii seeda
tan, o udda kadi.

Nde o yari ndee ledde dee, bikkon ñabbu
kon fof mbaati, o samori, o rutti lekkol.

Hankadi, Yerel wontaa raabtude hay gooto.



Yerel joñaaama lebbi keewdi.
Mawniko debbo, Ayse, wuppiratnoo comci
makko dii ko wordesawel.
Ayse wadatnoo ko booleeje Yerel fof
bannge, omo de lawyira ndiyam nguldam.
Ko kanko kadi paasiratnoo comci dii feer
guldo.
Dum muusiino no feewi, kono Yerel samorii.

Jooni Yerel dañtii ɓanndu, omo ñaama no moyyi.

Yerel ina yara kosam ko heewi.

Yimbe galle oo, e sehilaabe mum bee fof ina pijda e mum.

Sukaabe bee nattii hulde ñawu makko nguu.
Nde o ruttii lekkol, fof'en njabbii mo,
ngummii ina njala.

Madam makko, Neene Wiige, doftii mo to
biro Nooroo, dirikteer oo.



Nde o yottii e kalaas hee, giyiraabe makko
bee ngoni e fobbande mo.

Yerel wi'i o heppiino artude e kalaas hee.
So futbal wadii, ko kanko wonata gool oo.
Yerel ina mawnira no moyyi, omo softina
banndu makko.

Sehilaabe makko kulle ladde dee fof ina
robbaana mo. réussir

Yerel Cewngu anndii cuudi udditte, cerdi naange ina naata.

Henndu yonndu ina foti naatirde e kenorde dee.

Suudu fotaani faadde, kulle keewde ina ndennda leeso wooto.


Hanti kam, Yerel renndat e kulle godde dee, ina ngottodoo, ina kirtodoo.

Omo weltii e Neene Cewngu, Abuu, Ayse, Baaba Cewngu e sehilaabe mum bee kadi.

NAAMNE DEE :

1. Ñawu Yerel nguu, ko addi ngu ?
2. Mbele Yerel ina yahatnoo lekkol nde o ñawi ndee ?
3. Mbele Baaba Cewngu e Yerel'en koddi ?
4. Hol ko mbasiyoto-daa neddo gondudo e ñawu Yerel nguu ?

Danngal 6ooysgal



Nde Ngaari dannotoo ndee, tawi ina woni e
hakkunde doole mum, alaa ko o wondi.
Leydi ndi o yahi ndii, o wadi toon duubi
joyi, o artaani.

Nde o hebori artude ndee, o winndu
bataake, o neldi besngu makko.

A anndini ñalaande nde o anniyii artude,
e sahaa oo kala.


Joom suudu makko, e bïbbe bee fof puðdii
haaldude e gartugol makko ngol.

Mustafaa, konna oo, anndaa baaba mum.
Pennda noon, ko baaba mum dannii koo
joodii toon, welaani dum.

Pennda noon janngata ko to iniwersitee too.
Mustafaa naatii lekkol rowane, nde dañi
ndee duubi jeegoom.

Ko e hitaande adannde nde Ngaari yahi
ndee tan, o neldi kaalis laabi didi.

Ko ndeen Raamata wayri hebde ko ummii e
Ngaari.



Ko duum addani Raamata yeeyde liddi to
jehre Sanndaga Ndakaaru too.

Ko kaalis njeeygu nguu o jogorii galle oo,
gila joom galle makko dannii haa hannde.
Hannde noon, Raamata hebii bataake
ummoriido e Ngaari.

O janngii bataake oo laabi laabi,
mijjo fof ina jola e bernde makko ndee.
Pennda yahii, yaltinoyi albom fotooj ee oo.
Omo yeewa do o wondunoo doo e neene
makko, e baaba makko, e miñiko Mustafaa.

Baaba makko ummii doo ko e duubi mum
capande tati e joyi, e cagataagal mum.
Neene mum wiyi dhum: Baaba maa ko joom
doole wonnoo, hay gooto meedaa yawaade
mo!
Mustafaa ari subii foto wooto, o dogi
o holloyi neene makko to kaatane too.
Raamata yeewi foto ngoo, wiyi mo : « Doo,
tawi baaba maa ina heblanoo dannaade.
Ndeen, tawi a dañaama haa keb-daa lebbi
didi, ndeen foto ngoo doo wadaa.



Danngal ngal ko bettunoongal, ngal
heblanaaka, ko isin mabbe tan nawi mo. »
Pennda wi'i neene mum : « Ko hadnoo mo
joodaaade, o waasa yahde ? »

- Baaba maa yidnoo ko joodaaade, kono ko
teddinde liggeey makko tan saabinoo o yahi.
- Ko wadi noon, gila o yahi haa jooni o
artaani, o neldaani ?

Raamata wi'i biddo oo : « Alaa, baaba maa
neldii laabi didi ! »

- Ndeen noon wayri, sabu o nelditaani gila
ndeen. Mbar ko jam ?

Raamata fobbi hello, wi'i biddo oo :
« A duwantaako mi jam, baaba maa ina e
jam ! »

Pennda wi'i : « Ko miijo am tan wonnoo,
kono mi yi'ii ina njogori-daa nii galle oo! »

Raamata wi'i : « Ngaccen kaan haala,
ndu'ano-den baaba maa yo o artu e jam ! »

Feccere jamma Ngaari yottii galle, tawi
fof'en daaniima.

'Be njoodii haa woodi konngudo, Raamata
udditi, artiri junngo e hunduko : « Holi oo ? »
Sukaabe bee fof pindi, be ndogi, be ngari.



Raamata e Pennda kebtinaani Ngaari,
sabu fooyndam, tee omo waylii no feewi.
Weste jooddo no feewi o boornii ;
mido sikki ko ko tiidi o soodi mo.
Bagaas o addi oo ina heewi haa ko sofeer
taksi oo walli mo naatnude nder galle.
Yimbe galle bee mbismii Ngaari nder saal,
be ngoni e yeewtude.

Raamata ina yeewa gorko mum oo, oon ina
yeewa mo, haa booyi be njidi woyde.


Raamata ina woya, ina wi'a e bernde mum :
« Ngaari am jahnoodo oo artii ! »

Ngaari haalaani hay batte, so wonaa tan
omo weltii, omo moosa, omo jala.

Raamata ina naamnoo mo hol to o wonnnoo
e hol ko o liggottonoo toon.

Nde weeti, Mustafaa, tokosel ngel dogi ari wi'i
Raamata : « Neene, hol nde baaba am ari ? »
Raamata wi'i ngel ko o kiirdo arde, tee
tampere danngal ko ko jaggi mo no feewi.

Nde Pennda fini, neene makko hollondiri
mo e baaba makko, o weltii heen no feewi.
Kono o wi'i neene makko : « Baaba am ko
gasdo, to o wonnnoo too welaani. »



Ko e dow duum, Pennda wi'i yo baaba mum
ar yaha lopitaal sabu omo nanndi e tampudo.
Ko nii woni be nawi baabiraado oo,
doktoor oo wiciti mo.

Doon e midi yonde, tawi o wadanaama ko
foti wadaneede koo fof.

Be mbi'aa yo be ngartu doon e balde nayi,
o yeeewtee.


Oon sahaa noon, ko doktoor oo Ngaari
yiidata, o winndana dum ledde godde so
tawii o seboraani.

Ñande d̄um yonti, Ngaari yahdi e Pennda e
yumma mum, ɓe nduttii lopitaal.

Ñande heen, doktoor oo wi'i Ngaari wonde
ko liggeey muusd̄o jaggi d̄um.

Doktoor holliti mo wonde omo foti
fooftaade no moyy'i, tee o yara ledde dee.
O fawi heen kadi wonde so o rewii jamirooje
dee maa o sebor no moyy'i ko booyataa.

Besngu nguu fof yetti doktoor kono o
holliti wonde d̄um jaraani sabu o wadi
tan ko gollal makko.



Doktoor oo wi'i, omo foti ñaamde no moyyi,
tee o yetta ledde dee, o waasa yejjitde.

Raamata wi'i maa be njaggiran Ngaari
haa sella.

Ko goonga, omo tampi kono omo tiidnii,
tee omo jogii jom.

Doktoor wi'i yo o rew ledde dee,
tan o yeewa.

Maa mi totte deftel binndangel ko moyyi
ñaaamde, besngu maa janngora heen.

Yo be piib anniya tan, aan ne mballitaa be
e toppitagol ngol.


Balde ina benna, Ngaari ina golla ko
doktoor oo yamiri mo koo.

O fuddiima yiide jam e tampere
jaggunoonde mo haa fof'en kuli.

Sahaaji, omo yahndodoo e besngu makko,
tee omo softa heen.

Sahaa e sahaa kala, omo wirtoo nokkuuji di
o hebtinaani hakke ko o booyi e danngal.

Sukaabe makko ngona e jalde mo sabu
makko yejjitde won e mbeddaaji
di o anndunoo.



Ñaldí ina bura yahde, Ngaari ina sebora.
O tolniima do nganndu-daa o yidi ko etaade
yahde to attaliyee too, o bamta liggeey.
Joom suudu makko wi'i mo ina moyyi, kono
yo o wad seese, o waasa tampinde banndu
makko.

Ko noon Ngaari doftorii wasiyaaji dí
doktoor oo e joom suudu makko totti dum.
Banndu mum ina artira seeda seeda,
haa booyi Ngaari wadti welde yiye.
Koddayel ngel suusti mo, haa wattindi
woowi dum, omo fijda e makko.

Ngaari fudditii wuurtude, bernde mum
beydii huccitde e aduna.


Ko nii woni, o udditi attaliyee minise e sara
galle makko, omo toon dawa subaka kala.

Haadaani doon tan, sabu o sosii fedde
findinoore sukaabe haa njoodoo e leydi hee.

O fuddorii ko e sukaabe tokosbe bee, omo
yeewtana be ko feewti e yidde leydi mum.

Nde o fuddotoo, heewbe njidaano arde
tawtoreede jeewte dee.

Kono e wattan fof, sukaabe leegal ngal
mbadti arde e jeewte hee.



Raamata, biddo janngoowo doktoraagal
to iniwersitee too, ari ina wallita mo.
Yahii haa ko sukaabe leegal ngal mbattindi
yettitde jeewte dee ina mbada de.
Jooni, dum yawtii boom leegal mu'en ngal
tan, dum sariima e leede godde dee.
Deya too balde, wadii tele gooto gardo e
leegal hee mbele omo yeewtida e Ngaari.
Sukaabe leegal ngal fof ngarii tawtoreede
yeewtere ndee.
Yeewtere ndee yalti e tele, yimbe njeebi
dum, teleeji goddi ngari yeeuwde Ngaari.

Heewbe beydiima yaajnude ganndal mu'en
e ko faati e joodaaade e leydi mum, bamta ndi.
Yimbe bee beydii softude e feewnude
nokku mumen, be njabi joodaaade e leydi
mabbe, be liggoo.

Hay yidnoobe yahde bannge goddo mbattini
ko joodaaade liggi e nder gure mu'en.

Ngaari ruttiima to doktoor oo too,
yetti dum e ko oon safri dum koo.

Ngaari hollitii mo ko waabe no makko
nii njari yetteede.



Wadi sahaa, Ngaari joodii, ina yeewtida e
besngu mum.

Woodi suka debbo naatdo, tan Ngaari
wulli : « Hayyoo sehil am ! »
Ndeke, naatdo oo e Ngaari ndenndunoo
liggeey.

Caggal nde o salminaa haa sadii joofi,
o addanaa ndiyam, o yari.

Ngaari woni e naamnondirde e makko
sehilaabe.

Suka debbo oo haalani mo no be ngoori
toon kala.

Doon e doon, o yaltini kaayitol banke,
o toti dum Ngaari.

Ndeke ko isin to Ngaari liggotonoo too
neldi dum kaayitol ngol.

Ngaari weltii heen, wi'i ko sukaabe
muudum bee adotoo soodande heen
ordinateer.

Sukaabe bee ne ngoni e welkude,
ina ndiwndiwna.



No janngo e mum nii, ndeen be pinii,
Ngaari yahdi e sukaabe mum
e joom suudu mum.

Caggal nde o tiiroyii kaalis oo haa o hebi,
be njahii e bitik mawdo.

Be tawii toon ordinateeruuji baddi
faayienda, moyyi, tee jooddi.

Ngaari soodani be mo hono mum alaa,
sukaabe bee njaggondiri kees ordinateer
oo no moyyi.

Sukaabe bee ina keppa ko njettotoo haa
be kubba ordinateer oo.

Ndeen be naatii galle tan, sukaabe bee
ngoni e tampinde baaba mabbe naamne.
Ko e dow duum o yaltini ordinateer oo,
fof'en ngullidi, galle wonti diiraango wooto.
O wi'i yo be kuutoro ordinateer oo,
be beyda jaŋde mabbe.
Duum maa saabo be ndaña wune,
be ndaña doo liggeey, be mbaasa yaltude
leydi ndii.

NAAMNE DEE :

1. Hol do Ngaari wonnoo e sahaaji
jawtudi dii ?
2. Hol doftudo Ngaari faade to lopitaal ?
3. Hol ko wadi haa Ngaari dañti doole,
haa darni attaliyee minise ?
4. Hol mijo mon e no Ngaari
toppitortoo besngu mum nguu nii ?

Wuro Falto e Wuro Safro



Meedii woodde gure didi kucondirde,
ngoo ina wi'ee Falto, ngoya ina wi'ee Safro.
Hodbe bee Falto, do taw-daa be fof,
ebe ngetoo wadde ko hadata be ñawde.
Hodbe bee Safro, do taw-daa be fof,
ebe dabba lekki no be cafrorii.
Ñande wootere, joom wuro Safro fotti e joom
wuro Falto, o wi'i dum : « Safro, cellaa! »
Joom wuro Falto, hebbitii, wi'i dum :
« Falto, cellaa! »
Joom wuro Safro wi'i joom wuro Falto :
« Aywoo, ar mbaden cokki ! »

Falto ñibi cokki ledde, Safro addii cokki kaay'e, be puđđii sokkaade.


Gooto e mabbe kala, yimbe wuro mum ngari, ndarii caggal mum, ina nduñca.

Joom wuro Falto yetti cokka leggal wadi e wullo, wi'i : « Faltaade buri safraade ! »

Faltonaabé pođđani joom wuro mumen oo.

Joom wuro Safro yetti haay're, wadi e wullo, wi'i : « Safraade buri faltaade ! »

Safronaabe luuki haa dow, be ngoni e fođđande joom wuro mumen.



Joom wuro Falto y'ettiti cokka leggal ngodba, wi'i : « Ndeento-den ñawu! » Wonbe caggal mum bee fof ndenti ina luuka, ina ndiwa.

Joom wuro Safro y'ettiti haayre wodnde, wi'i : « Mo cafru-mi fof sella! » Safronaabe ndenti kadi, ngoni e fobbude e amde. Falto y'ettiti konngol, wi'i d'um : « Kala ñemtindo mi, yaawataa ñawde ! » Faltonaabe ndenti kadi ina cuuta juude dow, ina luuka.

Wondunoobe bee e Safro, yetti dum,
be ndoondii dum, njahi ina dum njima,
be mbi'i ko kanko hawi.

Falto wi'i Safro : « Mo-wuuri, yo en kawrit
doo kadi ! »

Safro wi'i dum : « Maa mi beydu ledde
am. »

Falto wi'i yimbe wuro mum : « Woto tikkee,
paden haa mo-wuuri, maa en beydu peeje
paltagol ! »

Hakkunde Faltonaabe e Safronaabe,
hol mo burata sellube, mo-wuuri ?



Nde Safro e yimbe mum kooti wuro,
be naati ladde, ebe dabb'a kaakooli e dad'i.
Be mbadi suudu hudo mawndu,
hedde ladde hee.

Caggal duum, be moofti ledde maabbe
fof e nder suudu mawndu nduu.

Suudu hudo nduu heewi tep ledde,
Safronaabe fof mbeltii.

Kikiide oo, be mbadi welnere mawnde,
be mbaali yimde e amde haa gite laabi.

Tawi oon sahaa, to wuro Falto, yimbe bee
ebe ina peewja no be ndeentorii ñawu.

Booyaani tan, be mbinndi deftere
hawridinnde peeje paltagol ñawu fof.

Joom wuro Falto nawi deftere ndee, nde
muulaa, nde tottaa yimbe wuro mum fof.
Caggal duum, o mooftoy deftere mawnde
ndee do laabi.

Wuro Falto woni e janngude deftere ndee,
ina rewa wasiyaaji dii, ñawu wodditii
dumen.



Nde dūm woni lebbi sappo e didi, hitaande timmi, Safro e Falto poti hawritde kadi.

Ngol kadi, gooto kala ina ardi e yimbe mum, bē ndarii, bē kucondiri.

Safro fiytii becce wi'i dūm : « Ledde cafrooje dee fof ko miin jogii ! »

Safronaabe luuki : « Minen njogii dūm, minen njogii dūm ! »

Falto yetti konngol wi'i : « A tinii deftere nde Faltonaabe mbinndi ndee e deentagol ñawu ? »

Booyani tan woodi gardo, ina leppi cebek warñeende : « Suudu men ledde nduu sumii ! »

Safro ummii yahdi e yimbe mum,
be ndogi, be nduttii wuro mabbe.
Nde be njettii, be tawi suudu hudo nduu
sumii haa roysi, wonti ndoondi.
Hudo ladde koo sumi, hubbi suudu hudo
ndu ledde dee ngonnoo nduu.
Nde yimbe bee ngari ndee, be tawi suudu
nduu wontii ndoondi boldi.
Safronaabe kebi cadeele e mette mawde.



Nde Falto tini ko wadi koo, yahdi e yimbe
mum laaroyde Safronaabe bee.

Nde be njettii, Falto yetti konngol e innde
yimbe wuro mum, wi'i dumen : « Yo Alla
hoytin cadeele ! »

Nde o gasni, o totti Safro mballitaari
Faltonaabe.

Joom wuro Safro haftodi e sekre, wi'i mo :
« Minen Safronaabe min yettataa sadak ! »

Joom wuro Falto e yimbe mum, haala kaa betti dumen.

Falto etii wadde maslahaa haa sawti, joom wuro Safro salii haa yoori.

O etii haa tampi, Safro salii, wi'i y'ettataa ballal ngal Falto addi ngal.

Falto e yimbe mum ndañi heen gacce no feewi, be kooti wuro mabbe.

Ko duum wadi Safronaabe e Faltonaabe mbaawraani haa jooni.

Faltonaabe e Safronaabe, gooto kala jaggi hoore mum e oya.



Nde be njoodtii hitaande, yimbe wuro
Safro fof ñawi, lelii, be kortii wadde hay
golle goote.

Gese mabbe keewde ndonkaa remeede e
ndunngu hee.

Hudo koo mawni, fa'i dow, alaa gawri
mawni doon.

Sukaabe heewbe njanngoyaani sabu
ñabbuuji, mawbe fof lelii ina ngoytoo.

So jamma arii, wooda e yimbe Safro
ummiibe kodoya bannge goddo.

To wuro Falto too, yimbe bee fof ebe
ngondi e softeende e cellal.

Gese mabbe njeñi, be ndañi yaakaare
gawri, gerte, basi e gedé godde fof.
Yimbe bee ngondi e cellal, weltaare e
semme, ebe njoodoo e batuuji,
ebe njeewta.

Sukaabe bee ina pija, ina njala,
ina njanngoya, ina ngarta.

Sagataabe bee ina piya lammbaaji,
ebe cippira e wodbe, ebe liba.

Yimbe Falto mbinnditii deftere wodnde,
e nafoore Paltagol wi'eteende :
Boortaade hade maa sumreede.



Goram, wuro Safro, ko yimbe seeda kodí doon jooni.

Bee njahi dabboyde ñawndudo dumen,
bee ina ñawi, ina lelii.

Hay joom wuro Safro, natti waawde hay batte, kanko ko o ñawdo, ina lelii.

Dadi, haako, baaji kahi, e gede godde,
fof Joom wuro Safro yettii.

Mbuuwri e kurujuru keewi e mbeddaaji
wuro Safro, diyye tuđi, ɓowdi keewi.


Joom wuro Falto noddi batu to hakkunde
wuro too.

Fof'en ngari, nootii Falto, o yetti konngol
wi'i : « Kala ko yonti, yontii ! »

O wi'i dumen : « On nji'ii cadeele jannde dee
e koreeji men Safronaabe bee.

Woodi gummiido, wi'i : « Wuro Safro, wontii
gente, neddo heddaaki doon hannde ! »

Goddo yetti konngol wi'i : « Mido dumen
yurmaa, sabu hay gooto sellaani doon ! »



Joom wuro Falto wi'i dumen : « Njidnoo-mi ko njahden, mballoyen yimbe wuro Safro. » Gooto fof rokkiri miijo mum, fof'en njahdi e miijo joom wuro Falto ngoo.

Yimbe bee nanondiri e ko foti adaade Wadeede to wuro Safro too, wi'aa, ko laabal. Yimbe wuro Falto yetti kabirde mumen, be ñalloyi wuro Safro, mi ñalli fittude. Nde hiiroyta, tawi wuro Safro laabii cer, alaa ni hay tuundi ngootiri, walla ndiyam tuddam.

Saare bowdi ummii wuro Safro, diwi dabboyi
wuro wodngo, tunwungo, hodoyi toon.

Wuro Safro wuurti, sabu jooni engo laabi,
engo weeytii.

Booyaani tan joom wuro Safro selli, yalti,
yiyi wuro mum ngoo engo neyba.

Bernde makko buubi, o fottitini yimbe
heddinoobe doon bee fof, o haaldi e mabbe.
O labndii be hol mo labbini wuro ngoo,
be mbi'i mo ko Faltonaabe.

O wi'i be : « Falto e yimbe mum be ndiiwno-
den arde labbina wuro men,
ko dum gacce ! »



Safronaabe kaaldi haa ɓe nanondiri e ko
ɓe poti wadde koo. Noon tan, Safro yahdi
e yimɓe mum haa ɓe njettii e damal wuro
Falto, o neli neddo, tintinoowo.

Nelaado oo yahi to joom wuro Falto wi'i
dum : « Ko joom wuro Safro neli mi. »

Joom wuro Falto e yimɓe mum, kala yeeewdo
goddo oo, haawee.

Nelaado oo wi'i mo : « Omo ma fadi,
aan e yimɓe wuro maa, Boggal Aadi ! »

Nde joom wuro Falto yahi haa yi'i Safro,
o heftinaani dñum sabu no naywiri nii.


'Be calmondiri haa joofi, Safro wi'i dñum :
« Accan am hakke, ko mbañno-maa-mi
koo. »

Joom wuro Falto jaabtii dñum : « Mi yaafimaa
ma e bernde buubnde reyum ! »

Safronaabe mbi'i : « Wuro amen ko
siccunoongo, diy'e tudde e bowdi keewdi
njaltii doon.

Laab-labbinal ngal mbad-don doon ngal,
ko kamngal sellini Safronaabe fof !

Nguli banndu, muuso reedu, deedi dogatdi,
e buubi, fof ngummiima wuro amen jooni. »



Faltonaabe ndefani Safronaabe, nawani
dumen, be ñaami haa be kaari.
Nde be ñaami haa be ngasni, be ndefanaa
ataaya beldo, gondudo e naanaa.
Joom wuro Safro e yimbe mum njari e
ataaya hee haa be njonaa, be lelii, be pooftii.
Noon tan, joom wuro Safro hucciti e dental
ngal fof, wi'i : « Mi wadii Falto gardiido ! »
Colli gonnoodi e dow Boggal Aadi ngoni
e yimdude.
Dental ngal fof weltii, ebe moosa, ebe
njalda, gooto kala ina salmina goddo oo.

Nanondiral haakkunde gure Falto e Safro
beydii yajjitde cellal e leydi hee fof.

Suka e mawdo, debbo e gorko, fof beydiima
softande janje e golle.

Dañal ndema kaa beydii, nguura oo yoni,
fof'en ina ñaama haa kaara.

Sukaabe bee ndañi wune mawdo e janje
hee, jinnaabe bee mbeltii, be mbeltini
sukaabe bee.


Leydi ndii dañi wune e coftal balli, sabu ko
kamen nawi araaraay lamma badnoodo to
Niiseer too.

Woto en njejxit abadaa, jiddo sellude,
yo jañ wonde : faltaade buri safraade !

NAAMNE DEE :

1. Hol no gure didi dee mbiyetee ?
2. Hol e majje wadi yimbe ñawnoobe bee ?
3. Wuro ngo yimbe maggo ñawnoo
ngoo, ko ñawni be ?
4. Hol mijo mon e no neddo foti
wadde, so o yidaa ñawde ?

Ngoone ko ኃasaado



Ngoone e Maateeru ina pijatnoo gada wuro.
Maateeru addi ñaañoru mum yoodndu,
holli ndu Ngoone, wi'i ko kaaw mum
soodani dum ndu.

Ngoone wi'i dum, miin ne mido jogii binngel
leddal, maa mi addu ngel janngo pijiren.

Maateeru wi'i dum : « Wadde janngo maa
mi ñaañan binngel maa leddal ngel. »

Ngoone ina jala, ina weltii, sehil makko
Ullundu ina yeewa cukalon pijatkon ina
njeewta kon.


Haa seeda tan, Neene Kummba noddi
Ngoone, wi'i dum : « Ngoone kooten
noon. »

Ngoone jaabii : « Neene mi yidaa hootde
jooni noon, mi fijdat e Maateeru seeda ! »

- Maa a artu, accu haa janngo pijdaa e
sehil maa.

Ngoone noon, bernde ina yoogi, wi'i
Maateeru : « Wadde mi yahii haa janngo. »

- Eyyoo, haa janngo, Ngoone, mbaasaa
yejjit addorde binngel maa leddal ngel
noon !



Ngoone tikki no feewi noon, ko foti hootde
koo, kono tan yahi, yahdi e neene mum.

Nde be kooti ndee, o lootii, o hirtii, neene
makko leloyi mo.


Omo dum loota haa o yi'i puttelle yeeso mum.

O wi'i dum : « Ada wadi doo puttelle,
mido anndi ko ñuuñu fid maa doon.

Woto mem ngel, accir noon, maa ngel sellu ;
haa subaka, e jam. »

Neene makko ñifi lampa oo, artiri damal
ngal, o daanii.

E janngo mum heen, Ngoone heppi no feewi
yahde fijidoya e sehil mum Maateeru.
O haftii e leeso tan, o yahi omo lootoyoo.
O yeewi daarorgal tan, o faayi.
O anndaa ko dum woni, kono banndu nduu
ina fedda tan.
Yeeso ngoo fof ina wonti puyon puyon.




O luuki, tan o noddi neeniraawo oo, oon dogi
ari wi'i dum : « Ngoone, ko dum woni ? »
Kala yeeewdo wi'a : « Dum kam ko dum
woni, ellee ko o camaado. »
Neene Njeeme memi hoore ndee,
tawi ende wuli jaw.
O wi'i dum : « Dabbel am, aan dee ko a
paawaado !
Njahen dispaaseere, to gorgol Kummba,
o yeeew maa. »

Nde ɓe ngari, Doktoor Kummba boli
Ngoone haa laabi.

O yetti luppu, ko wa'i no daarorgel
mawninatngel, omo laartindoo puy'e dee.
O wi'i Neene Njeeme e Ngoone : « Dum,
ko dum came ! »

Ngoone haawaa, wi'i dum : « Ko woni
came ?

Wadde ɓanndu am ko wadndu ŋappati. »




Neene Kummba wi'i dūm : « Alaa !
Dum doo wonaa hay batte, ko dūm puy'e
jaltatde tan, jooni dūm sella.
Maa mi tottu ma doo ledde de neene maa
weedat maa, so banndu maa wulii.
Goddum dūm, ko siro, a yarat mbo mbele
peddugol banndu ngol ustoo.
« So a hootii noon, a loototo haa laabaa,
lelo-daa, mbaasaa ñaañaade.
So wonaa dūum tan, a yaawataa sellude,
tee ada waawi raabtude yimbe wodde.

« Came alaa ñakku, te ina yaawi ko raabata.
Duum wadi, gondudo heen fof, a joodoto
galle maa, mbaasaa yaltude. »

Gorgol Kummba, ñawndoowo oo, omo dñum
weltina, o wi'i dñum : « Eyyoo, seydi Bah !
Aan ko a cukalel cuusngel reedu ; woto
ñaaño puy'e dee, a nanii, jooni cellaa. »
Ngoone wi'i : « Eey. »

Gorgol Kummba dofti be haa to damal
dispaaseere too.
Be mbaynondiri, o yahdi e neene makko,
be kooti galle.



Nde ɓe keboyi, Neene makko feewtini
leeso ngoo, o wi'i d̄um : « Ar lelo doo ! »
Ngoone ina anndi fotaani ɳaañaade,
kono puy'e dee ina pedd̄a ko moyȳi.
O woni e ñurmbitaade e leeso hee tan.
O yetti wudere nde o suddinoo ndee,
omo nde dirga e dow puy'e peddatde dee.
Neene oo hoolkisii, o wi'i : « A nanii ko
doktoor Kummba wi'i koo, woto ɳaaño dee !
So a ɳaañaaki, looti-d̄aa haa laabi, jooni
puy'e dee njaha laabi majje, cellaa. »

Ngoone ɳuuñi, wi'i : « Kono Neene, ina fedda no feewi dee ! »

Neene makko wi'i : « Fad mi wulnan maa ndiyam, mi loot maa, maa a weeyto no moyyi ! »

Nde yumma oo wulnata ndiyam ndee,
Ngoone ina lima puy'e gonde e banndu
mum dee : « Jeetati e yeeso, jowi e junngo,
wooroo capande tati e banndu am ! »
Neene oo noddi dhum : « Ngoone, ndiyam
dam wulii, ar looto. »



Ngoone naati e lootorde hee, ndiyam ðam ina
ðebi wulde seeda.

O seppinii, woni e fijirde binngel ledðal ngel,
e ñder beñwaar hee, o yejjiti pedðdeeki kii.

O woni toon dumunna, neene makko wi'i
mo : « Ngoone yaltu noon ! »

Nde o gasni, neene makko totti mo aspirin
sabu ðanndu wulnoondu nduu.

O totti ðum kadi siro gustoowo pedðdeeki.


Ngoone lelii, natti tinde hay ndiga.

O wi'i neene makko : « Mido sokli yahde to dingiral too, mi fijidoya e Maateeru.

Mi nattii feddeede. »

Neene oo wi'i dhum : « Alaa Ngoone, hannde a waawataa fijdoyde e Maateeru'en.

A sellaani, duum noon a joodoto e galle hee, poofto-daa. »



Ngoone mettaa no feewi ko o waawaa
fijidoyde e Maateeru koo.
Maateeru maa sikku wonde o haalaani
goonga, o alaa pijirgel.
Banndu makko nduu nii boom nattii
fedduude.
Neene makko wi'i mo : « Maa a fijdoy
e Maateeru so puy'e dee fof nattii.
A nanii ko doktoor oo wi'i koo !
O wi'i ñas ko ko raabata, tee so a yahii to
Maateeru, a raabtat mo.»

Ngoone yidaano raabtude Maateeru, sabu ko sehil makko.


Ngoone jabi ko neene mum wi'i dum koo,
rutti, leloyi e leeso mum.

O heppi no feewi noon, mbele puy'e makko
dee ina cella.

Ko o waawaa ηaañaade koo kadi haabnii
mo no feewi.

Heen sahaaji, ina fedda ko moyyi boom.

Kono so o ηaañiima puy'e dee, o yaawataa
sellude, tee ko o jiddo fijdoyde e Maateeru.



Buri dum haabnaade fof noon, ko ko o alaa
koo mo o fijdi.
Wi'aama, o yahataa lekkol haa o sella.
Sukaabe galle bee fof kadaa arde,
ina badoo Ngoone.
Kono mawbe wonbe e galle bee fof,
ebe dum mbeltina.
Gooto fof ina toppitoo dum.
Baaba Abuu soodanii dum sokolaa
e banaana.

Taanoo Daawuuda okkii dūm gerte,
so jamma wadii omo dūm yeetanoo.
Gorgol Ayda ina joodii sara makko,
ina dūm yimana.

Neene makko ina noddira dūm « Dabbel
am », omo dūm yeeewra gite yurmeende.
Yimbe galle bee fof ina taarii dūm, so
noddii fof njaccoo ngara.

O weltii, anndi hannde ko kanko woni
laamdo, alaa peepatdo mo, fof'en
toppittoo mo.

Omo wi'a e bernde makko : « Ñawu noon,
ndeke ina wela, heen sahaaji ! »



Ngoone ina joginoo e galle hee mbeewa
ngoowba mo.

O wi'atnoo ba ko Aada, ko ba njoodba,
ndaneewa tal.

O yeewnita ba noon, no feewi, omo wi'a
e bernde makko, hay Aada mi hortiima
fijdude.

Ndeen mi raabtat ba ñas.

Baaba Abuu wa'i no nando ðum, o addoyi
Aada, humi ba e sara makko.


Aada yi'i Ngoone, ba weltii no feewi,
ba woni e taasaade e makko.

Ngoone ina yidi fijdude e mabba,
kono omo huli raabtude ba.

Baaba makko wi'i mo : « Fijdu e Aada,
so a yidii. »

Nedđo raabtataa mbeewa ḥas.

Ngoone yowti foofaango, o addi Aada sara
leeso makko, ba lelii doon.




Nde woni jonte didi, Ngoone fini subaka,
o tawi puye dee fof njahii.
O wi'i, eyyoo, jooni mi waawa fijdoyde
e sehilaabe am ; neene makko kadi weltii.
O wi'i dum : « Ada waawi fijjoyde hannde,
kono a hacittoo haa ngasnaa.
Yah findinoy miñe, o lootoyoo. »
Ngoone dogi, yahi suudu Muusaa,
ina dum findina.
O ñuurti mbajju mo o suddinoo oo tan,
o suumi hunuko.

Muusaa ne, yeeso ngoo ina wonti puy'e bole.
Ngoone luuki : « Neene ar, Muusaa ko
camaado, mi fotaani badaade mo ! »
Neene oo ari wi'i : « Alaa, so a samaama
gootol, a wontaa sameede. »
Ngoone fafi yejjiti pijdoygol ngol
e Maateeru.
O wi'i miñiko oo : « Ndeen noon, ko miin
toppitto maa, woto ñaaño noon, a nanii ! »
Miñiraado oo wi'i eey, omo anndi so ko
doktoor Ngoone kam, maa o yaaw samorde.

NAAMNE DEE :

1. Ngoone, hol ñawu o wondi ?
2. Hol no maale came mba'ata ?
3. Mbele came ina raaba,
no nganndir-daa düm ?
4. Aan a meedii sameede ?
Hol ko miji-daa heen?



Ce livret décodable gradué a été conçu et imprimé grâce à l'appui généreux du peuple américain à travers l'Agence des Etats-Unis pour le Développement International (USAID).



USAID
DU PEUPLE AMERICAIN